

續修廬州府志

卷四十七

武功傳二

卷四十八

武功傳三

卷四十九

武功傳四

續修廬州府志卷四十七

花翎道銜江南安徽廬州府知府清泉黃雲總修

武功傳二

明

趙馘廬州人乙未春與俞通海等同時納款從征宣城甯國長槍諸將乘勢下水陽克大浦口常州平陞行樞密院判官以舟師畧太湖馬蹟山降張士誠將王貴鈕津經洞庭山敗呂珍於施口復從攻趙普勝於樅陽拔柵江營復池州後征安慶九江等處皆有功

康熙志

左君弼廬州人元季據廬州張士誠將呂珍寇安豐君弼助之太祖師諸將擊珍敗走遂攻廬州君弼棄城走

續修廬州府志

卷四十七

武功傳一

一

汴元將李克彛使守陳州吳元年太祖遣使以書招諭君弼得書猶豫不能決太祖乃歸其母於陳州君弼感泣始納款命爲廣西指揮僉事君弼自効從征克捷二
年左江上思州蠻賊黃英傑與弟英覽聚眾萬餘寇鬱林命君弼爲副總兵討之英傑陣死英覽就俘自是兩

江獍酋膽落

明隆慶志

楊重三廬州人從明祖渡江累立戰功授成都中衛指揮同知長子宗當世官以讓其弟興入蜀有還遺金事

見佚事志

康熙志

張德勝字仁輔合肥人才畧雄邁與俞通海等以舟師自巢來歸從渡江克采石太平陳埜先來攻與湯和等

破禽之授太平興國翼總管破蠻子海牙水寨禽陳兆
先下集慶克鎮江授秦淮翼元帥取常州擢樞密院判
克甯國收長槍兵下太湖畧馬蹟山攻宜興取馬馱沙
及石牌寨進僉樞密院事趙普勝陷池州德勝往援弗
及還從徐達拔宜興復同通海復池州走普勝將胡總
管追敗之青山遂北至潛山陳友諒犯龍江德勝總舟
師迎戰友諒軍大敗與諸將追及之慈湖縱火焚其舟
至采石大戰沒於陣追封蔡國公謚忠毅肖像功臣廟
侑享太廟子宣幼養子興祖嗣職興祖巢人本汪姓既
嗣職從破安慶克江州拔蘄黃取南昌從援安豐大敗
張士誠兵鄱陽之戰與廖永忠等以六舟深入又邀擊

友諒於涇江口功最擢湖廣行省參政從平武昌遂克
廬州畧地至通州而還進大都督府僉事從徐達取淮
東下浙西進同知大都督府事大軍北征別將衛軍由
徐州克沂青東平乘勝至東阿降元參政陳璧及所部
五萬餘人衍聖公希學帥曲阜知縣希舉鄒縣主簿孟
思諒等迎謁於軍門興祖禮之充東州縣聞風皆下遂
取濟甯濟南洪武元年與大將軍會師德州帥舟師克
元都徇下永平西取大同時德勝子宣已長命爲宣武
衛指揮同知而興祖復姓爲汪三年進克武朔二州獲
元知院馬廣等至大同北口大敗元兵獲擴廓弟金剛
奴等四百餘人四年從前將軍傅友德合兵伐蜀克階

文乘勝至五里關中飛石死蜀平詔優賞其子追封東勝侯予世券興祖子幼命與宣同居以疾卒爵除

史明

楊璟合肥人本儒家子以管軍萬戶從太祖下集慶進總管下常州進親軍副都指揮使從下婺州遷樞密院判官再從伐漢以功擢湖廣行省參政進攻湖南蠻寇復以招討功遷行省平章政事將武昌諸衛軍取廣西洪武元年春進攻永州守將鄧祖勝迎戰敗歛兵固守璟進圍之久不下令裨將分營諸門築壘困之造浮橋西江上急攻之祖勝力盡仰藥死遂克永州進攻靖江不下璟謂諸將曰彼所恃西濠水耳決其隄岸破之必矣乃遣指揮邱廣攻插口關殺守隄兵盡決濠水築土

堤五道傅於城二月克之執平章也兒吉尼先是張彬攻南關爲守城者所詬怒欲屠其民璟甫入立下令禁止之民乃安復移師徇郴州降兩江土官黃英岑伯顏等而永忠亦定南甯象州廣西悉平未幾詔璟往使於夏是時夏主昇幼母彭及諸大臣用事璟數諭昇以禍福俾從入覲諸大臣皆持不可昇亦莫能決璟還再以書諭昇終不聽踰二年而夏亡璟遷湖廣行省平章三年大封功臣封璟營陽侯千五百石予世券五年充副將軍從鄧愈討定辰沅蠻寇再從大將軍徐達鎮北平練兵遼東十五年八月卒追封芮國公謚武信子通嗣

劉眞合肥人從太祖累官左軍都督充大甯總兵官靖
難兵起眞及陳亨卜萬引大甯軍出松亭關營沙河欲
復遵化亨陰結成祖入關眞夜負勅印浮海而南時建
文帝聞北平諸將皆降已籍眞家屬下獄俄眞由海道
出福建還應天詔釋之靖難後官左都督鎮遼東恆懷
愧憤竟以憂卒

康熙志

陳聞合肥人元末爲義兵千戶太祖克太平聞率眾來
歸充管軍千戶從征江南浙江武昌前後皆有功自楚
而蜀而滇滅賊平蠻俱奉調以偏師奏績官至成都右
衛指揮同知予世襲子瑄

康熙志

陳瑄字彥純合肥人聞之子少從大將軍幕以射雁見

稱屢從征南番又征越巂討建昌叛番踰梁山平天星
寨破甯番諸蠻復征鹽井進攻卜木瓦寨賊熾甚瑄將
中軍賊圍之數重瑄下馬裹創戰自己至西全師還又
從征賈哈刺以奇兵涉打中河得間道作浮梁渡軍旣
渡撤梁示士卒不返速戰破賊又會雲南兵征百夷有
功遷四川行都司都指揮同知建文末遷右軍都督僉
事燕兵逼命總舟師防江上燕兵至浦口瑄以舟師迎
降成祖遂渡江旣卽位封平江伯永樂元年命瑄充總
兵官總督海運輸粟四十九萬餘石餉北京及遼東遂
建百萬倉於直沽城天津衛先是漕舟行海上島人畏
漕卒多閉匿瑄招令互市平其直運舟還會倭寇沙門

島瑄追擊至金州白山島焚其舟殆盡九年命與豐城侯李彬統浙閩兵捕海寇海溢隄圯自海門至鹽城凡百三十里命瑄以四十萬卒築治之爲捍潮隄萬八千餘丈明年瑄言嘉定瀕海地江流衝會海舟停泊於此無高山大陵可依請於青浦築土山方百丈高三十餘丈立堠表識宋禮旣治會通河成朝廷議罷海運仍以瑄董漕運議造淺船二千餘艘初運二百萬石寢至五百萬石國用以饒時江南漕舟抵淮安率陸運過壩踰淮達清河瑄用故老言自淮安城西管家湖鑿渠二十里爲清江浦導湖水入淮築四閘以時宣洩又緣湖十里築堤引舟由是漕舟直達於河省費不貲其後復濬

徐州至濟甯河又以呂梁洪險惡於西別鑿一渠置二閘蓄水通漕又築沛縣刁陽湖濟甯南旺湖長堤開泰州白塔河通大江又築高郵湖堤於堤內鑿渠四十里避風濤之險又自淮至臨清相水勢置閘四十有七作長盈倉四十區於淮上及徐州臨清通州皆置倉便轉輸慮漕舟膠淺自淮至通州置舍五百六十八舍置卒導舟避淺復緣河堤鑿井樹木以便行人凡所規畫精密宏遠身理漕河者三十年舉無遺策仁宗卽位之九月瑄上疏陳七事一曰南京國家根本乞嚴守備二曰推舉宜覈實無循資格選朝臣公正者分巡天下三曰天下歲運漕餉湖廣江西浙江及蘇松諸府並去北京

遠往復踰年上逋公租下防農事乞令轉至淮徐等處
別令官軍接運至京又快船馬船所載不過五六十石
每船官軍足用有司添差軍民遞送拘集聽候至有凍
餒請革罷四曰教職多非其人乞考不職者黜之選俊
秀補生員而軍中子弟亦令人學五日軍伍竄亡乞覆
其老疾者以子弟代逃亡者追補戶絕者驗除六日開
平等處邊防要地兵食虛乏乞選練銳士屯守兼務七
曰漕運官軍每歲北上歸卽修船勤苦終年該衛所又
於其隙雜役以重困之乞加禁絕帝覽奏曰瑄言皆當
命所司速行遂降敕獎諭尋賜券世襲平江伯宣宗卽
位命守淮安督漕運如故宣德四年言濟甯以北自長

溝至棗林淤塞計用十二萬人疏濬半月可成帝念瑄
久勞命尚書黃福往同經理六年瑄言歲運糧用軍十
二萬人頻年勞苦乞於蘇松諸郡及江西浙江湖廣別
僉民丁 於軍多衛所僉軍通爲二十四萬人分番迭
運又江南之民運糧赴臨清淮安徐州往返一年失悞
農業而湖廣江西浙江及蘇松安慶軍士每歲以空舟
赴淮安載糧若令江南民撥糧與附近衛所官軍運載
至京量給耗米及道里費則軍民交便帝命黃福及侍
郎王佐議行之更民運爲兌運自此始也八年十月卒
於官年六十有九追封平江侯贈太保謚恭襄初瑄以
濬河有德於民民立祠清河縣正統中命有司春秋致

祭孫豫字立卿讀書修謹正統末福建沙縣賊起以副
總兵從甯陽侯陳懋分道討平之進封侯也先入犯出
鎮臨清建城堡練兵撫民安靜不擾明年召還父老詣
闕請留從之景泰五年山東饑奉詔賑卹尋守備南京
天順元年召還益歲祿百石三年卒贈黔國公謚莊敏
子銳嗣伯成化初分典三千營及團練尋佩平蠻將軍
印總制兩廣移鎮淮陽總督漕運建淮河口石閘及濟
甯分水南北二閘築堤疏泉修舉廢墜總漕十四年章
數十上日本貢使買民男女數人以歸道淮安銳留不
遣贖還其家淮陽饑疫煮糜施藥多所存濟宏治六年
河決張秋奉敕塞治還增祿二百石累加太傅兼太子

太傅十三年卒

明史

吳復字白起合肥人少負勇畧元末集眾保鄉里歸太
祖於濠從克泗滁和采石太平累官萬戶從徐達攻鎮
江克常州進統軍元帥援安豐平武昌克廬州下漢沔
荆諸郡縣授鎮武衛指揮同知守沔陽從常遇春下襄
陽別將破安陸克汝州魯山洪武元年授懷遠將軍安
陸衛指揮使平鄖均房竹諸山寨三年從大將軍征陝
西明年從傅友德平蜀又明年從鄧愈平九溪辰州諸
蠻進大都督府僉事授世襲指揮使十一年從沐英再
征西番論功封安陸侯食祿二千石十四年從傅友德
征雲南充總兵官勦捕諸蠻遂取廣西十六年克墨定

苗至吉刺堡築安莊新城平七百房諸寨轉餉盤江金
瘡發卒於普定追封黔國公謚威毅加祿五百石予世
券復臨陣奮發衝犯矢石體無完膚平居恂恂口不言
征伐事在普定買妾楊氏年十七復死視殮畢沐浴更
衣自經死封貞烈淑人子傑嗣屢出山陝河南北平練
兵從征建文中戰白溝河失律謫南甯衛指揮使宏治
十八年錄復子孫世職千戶

明史

葉昇合肥人左君弼據廬昇自拔來歸洪武三年論功
僉大都督府事明年從湯和以舟師取蜀越二年出爲
都指揮使鎮西安討平慶陽叛寇十二年復僉大都督
府事西番叛與都督王弼征之降乞失迦平其部落復

討平延安伯顏帖木兒禽洮州番酋論功封靖甯侯歲
祿二千石世指揮使鎮遼東修海益復三城在鎮六年
邊備修舉外寇不敢犯發高麗賂遺帝屢賜敕與唐勝
宗同褒二十年同普定侯陳桓總制諸軍於雲南定邊
姚安立營屯田經理畢節衛昇凡三平叛蠻再出練兵
甘肅河南坐交通胡惟庸事死

明史

鄭用合肥人自和州應募謹事太祖積功授平陽右衛
百戶陞大興衛副千戶子亨

康熙志

鄭亨父用爲大興左衛副千戶請老亨嗣職洪武二十
五年應募持檄諭韃靼至斡難河還遷密雲衛指揮僉
事燕師起以所部降厯遷中府左都督封武安侯祿千

五百石予世券留守北京永樂元年充總兵官備宣府
亨至邊度宣府萬全懷來形便每數堡擇一堡可容數
堡軍馬者爲高城深池浚井蓄水謹瞭望寇至夜舉火
晝鳴礮併力堅守規畫周詳後莫能易成祖凡五出塞
亨皆在行間洪熙初鎮大同墾田積穀邊備完固自是
大同希寇患宣德元年召掌行後府事已仍鎮大同轉
餉宣府招降迤北部長四十九人請於朝厚撫之歸附
者相屬九年二月卒於鎮亨嚴肅重厚善撫士卒恥培
克在大同時鎮守中官撓軍政亨裁之以理其人不悅
然其卒也深悼惜之贈漳國公謚忠毅妾張氏自經以
徇贈淑人子能嗣爵

明史

瞿通合肥人太祖駐師和陽從諸將來歸積功至鳳陽
指揮使陞大都督府僉事致仕卒贈右都督子能

康熙志

周顯合肥人精悍有膽氣驍勇過人自黃山來附東渡
江充帶刀先鋒侍左右定江浙戰鄱陽湖皆有功從常
遇春李文忠北伐收應昌紅螺山諸處授驍騎前衛指
揮使再從李文忠進兵阿魯渾河戰歿追封汝南郡伯

子巖有父風

康熙志

徐用合肥人元季守宣城率眾來附以功歷副千戶自
陳老疾以子忠代從征運餉勞績屢著陞濟陽衛世襲

指揮僉事鎮開平封永康侯

康熙志

馬雲合肥人隸長槍軍謝再興爲千戶再興叛雲自拔

歸數從征積功授指揮僉事洪武四年偕葉旺鎮遼東初元主北走其遼陽行省參政劉益屯蓋州與平章高家奴相爲聲援保金復等州帝遣斷事黃儔齎詔諭益益率眾來歸乃立遼陽指揮使司以益爲指揮同知未幾元年章洪保保馬彥翬謀殺益右丞張良佐左丞商暉擒彥翬殺之保保挾儔走納哈出營良佐以狀聞且言遼東肘腋皆敵境今保保逃往釁必起乞留斷事吳立鎮撫軍民帝命立良佐暉俱爲蓋州衛指揮僉事旣念遼陽重地復以旺及雲爲都指揮使往鎮之未幾納哈出果以眾至見備禦嚴不敢攻越蓋至金州乃刺吾者敵驍將也率精騎挑戰城下中伏弩爲明兵所獲敵

大沮引退不敢由故道從蓋城南十里沿柞河遁旺先以兵扼柞河自連雲島至窟駝寨十餘里緣河壘冰爲牆沃以水經宿凝沍如城布釘板沙中旁設坑穽伏兵以伺雲等建大旗城中嚴兵不動寂若無人已寇至城南伏四起納哈出倉皇趨連雲島遇冰城旁走悉陷於穽遂大潰雲自城中出合兵追擊納哈出僅以身免第功進都督僉事十二年命雲征大甯捷聞受賞召還京後數年卒雲之鎮遼也翦荆棘立軍府撫輯軍民墾田萬餘頃遂爲永利遼人德之嘉靖初命有司立祠春秋

祀之

明史葉旺傳

陳文合肥人少孤奉母至孝元季挈家歸以功積官都

督僉事卒追封東海侯謚孝勇明臣得謚孝者文一人

而已

明史蔡遷傳

甯仲英

通志作仲瑛

合肥人累以軍功陞前軍都督僉事子

福嗣以功封建平伯

明隆慶志

劉友仁合肥人弟謙元末各起兵保鄉里後歸明太祖

隸謝元帥麾下從胡大海取徽甯友仁授中軍左元帥

援池州與雙刀趙戰歿祀功臣廟謙襲兄職從征江西

洪武元年扈車駕幸北京以功多調山陝累陞都督封

流伯永樂間卒上聞輟朝遣祭

康熙志

胡通合肥人至元乙未明太祖駐師和陽通挺身來附

從渡江取江南浙江江西下武昌會征南將軍廖永忠

續修廬州府志

卷四十七

武功傳一

十一

等征廣東取肇慶等郡邑復會永忠於廣州降元守將

盧左丞累官指揮使陞前軍都督僉事

康熙志

王珪合肥人元末募集鄉民守廬州自稱萬戶鎮南巢

尋率眾歸太祖從征渡江克復太平仍命為萬戶守之

後下江南諸州邑積功授指揮使陞右軍都督僉事

明隆

慶志

鄭祥合肥人明初從太祖定四方以功歷官指揮僉事

洪武十四年從征雲南克普勝定普安曲靖善闡十五

年克大理後陞本衛指揮時西平侯沐英鎮雲南遇有

征伐率以命祥多見克捷二十年春浪穹逋寇煽羣蠻

為亂鶴慶劍川輒相為應祥率兵乘其未集掩而殲之

諸蠻讐服在鎮十餘年善馭下恩威兼濟軍民懷之

明隆

慶志

蕭春合肥人洪武初從征以北伐功授延安衛指揮予世襲其後有如薰官甯固薊保四鎮挂印總兵官如藺南京後軍都督府同知春歿賜葬本鄉之官廳卽舊居處也後太守張邦政爲立碑記其始末子姓世居其地

康熙志

王雄合肥人從太祖征伐立戰勲授指揮累陞河南都司都指揮使階驃騎將軍

明隆慶志

韋權合肥人元季從軍淮西爲列校太祖舉兵權來歸從渡江所向有功由指揮陞都督僉事

明隆慶志

續修廬州府志

卷四十七

武功傳一

十一

宋晟字景陽定遠人

崇禎志云世居合肥

父朝用兄國興並從太

祖渡江皆積功至元帥攻集慶國興戰歿晟嗣其職旣而朝用請老晟萬從鄧愈克徽州召還襲父官累進都指揮同知洪武十二年坐法降涼州衛指揮使十七年討西番叛酋俘獲萬八千人還復爲都指揮進右軍都督僉事仍鎮涼州二十四年充總兵官與都督劉眞討哈梅里其地去肅州千餘里晟令軍中多具糧糗倍道疾馳乘夜至城下質明金鼓聲震地闔城股栗遂克之禽其王子列兒怯帖木兒及僞國公以下三十餘人收其部落輜重以歸自是番戎懾服兵威極於西域明年從藍玉征罕東還調中軍都督僉事二十八年從總兵

官周興出開原至忽刺江部長西陽哈遁追至甫荅迷城俘人畜而還明年拜征南右副將軍討廣西峩嶮諸寨苗斬七千餘人又明年總羽林八衛兵討平五開龍里苗三十一年出鎮開平從燕王出塞還城萬全諸衛成祖卽位入朝進後軍左都督拜平羌將軍遣還鎮永樂三年招降把都帖木兒倫都兒灰等部落五千人封西甯侯祿千一百石世指揮使晟凡四鎮涼州前後二十餘年威信著絕域帝以晟舊臣大有將材專任以邊事所奏請輒報可御史劾晟自專帝曰任人不專則不能成功況大將統制一邊甯能盡拘文法卽敕晟以便宜從事會病卒晟三子長瑄建文中爲軍府右衛指揮

使戰靈壁先登斬數級力鬪死瑄弟琥尙成祖女安成公主得嗣侯予世券八年佩前將軍印鎮甘肅與李彬捕叛酋老的罕俘斬甚眾洪熙元年坐不敬奪爵弟瑛嗣瑛尙咸甯公主正統中歷掌左軍前府事也先入寇瑛戰死贈鄆國公謚忠順子傑嗣景泰中典禁兵宿衛以謹慎稱卒子誠嗣署右府事復佩平羌將軍印鎮甘肅誠有林武嘗出獵至涼州遇寇掠牛馬北去誠三矢殪三人寇驚散盡驅所掠還九傳至孫裕德死流寇難

史明

徐忠合肥人襲父爵爲河南衛副千戶累從大軍北征多所俘獲進濟陽衛指揮僉事鎮開平燕兵破居庸懷

來忠以開平降從狗灤河拔其城白溝河之戰忠單騎
突陣一指中流矢未暇去鏃急抽刀斷之控滿疾驅殊
死戰燕王乘高見之謂左右曰眞壯士也入京師自指
揮同知累遷都督僉事封永康侯祿一千一百石予世
券忠每戰摧鋒跳盪爲諸將先而馭軍甚嚴所過無擾
善撫降附得其死力事繼母以孝聞夜歸必揖家廟而
後入儉約恭謹未嘗有過成祖北巡以忠老成畱輔太
子監國永樂十一年八月卒贈蔡國公謚忠烈傳爵至
裔孫錫登崇禎末死於賊從兄錫蔭嘗襲侯卒無子其
妻朱氏成國公純臣女也夫歿樓居十餘年不履地城
陷捧廟主自焚死

明史

郭亮合肥人爲永平衛千戶燕兵至以城降卽命爲守
時燕師初起先畧定旁都邑旣克居庸懷來山後來州
皆下而永平地接山海關障隔遼東旣降北平益無患
成祖遂南敗耿炳文於眞定旣而遼東鎮將江陰侯吳
高都督楊文等圍永平亮拒守甚固援師至内外合擊
高退走未幾高中讒敗楊文代將復率眾來攻亮及劉
江合擊大敗之累進都督僉事成祖卽位以守城功封
城安侯祿千二百石世伯爵永樂二十一年三月卒贈
興國公謚忠壯妾韓氏自經以徇贈淑人子晟當嗣伯
仁宗特命嗣侯宣德五年坐扈駕先歸革爵尋復之無
子弟昆嗣伯爵

明史

史昭合肥人永樂初積功至都指揮僉事八年充總兵官鎮涼州土軍老的罕先與千戶虎保作亂虎保敗老的罕就撫昭上書言其必叛狀未至而老的罕果叛昭與都指揮滿都等擊平之移鎮西甯仁宗立進都督僉事上言西甯俗風鄙悍請設學校如中土報可宣德初昭以衛軍守禦不暇屯種其家屬願力田者七百七十餘人請俾耕藝收其賦以足軍食從之五年曲先衛都指揮使散卽思邀劫西域使臣昭率叅將趙安偕中官王安王瑾討之散卽思望風遁擒其黨蒼蒼不花等威震塞外七年春以征西將軍鎮甯夏孛的達里麻犯邊遣兵擊之俘獲甚眾進都督同知正統初昭以甯夏曠

遠難守請於花馬池築哨馬營增設烽堠直接哈刺兀速之境邊備大固尋進右都督時阿台朵兒只伯數寇邊詔昭與甘肅守將蔣貴趙安進剿竝無功貶都督僉事三年復右都督八年以老召還明年卒

明史

陳圭合肥人陳瑄從孫以薦出鎮兩廣封川寇起圭督諸將往討擒其魁俘斬數千加太子太保復平柳慶及賀連山賊加太保蔭一子安南范子儀等寇欽廉黎岐賊寇瓊厓相犄角圭移文安南曉以利害使縛子儀而急出兵攻黎岐敗走之論功復蔭一子加歲祿四十石圭能與士卒同甘苦聞賊所在輒擐甲先登深箐絕壑衝冒瘴毒無所避以故所向克捷在粵且十年殲諸小

賊不可勝數召還掌後軍府主妻仇氏咸甯侯鸞女弟也圭深嫉鸞鸞數短圭於世宗幾得罪鸞敗帝益重圭命總京營兵董築京師外城如太子太傅卒贈太傅謚武襄子王謨嗣僉書後軍出鎮兩廣賊張連反屠掠數郡王謨會提督張臬討平之論功加太子太保蔭一子萬曆中出鎮淮安總漕運入掌前軍府事卒贈少保謚

武靖

明史陳瑄傳

宋炳字景光合肥人明初饒州總制閩蕭名來寇與知府陶安嬰城拒守明日賊架船百艘犯南門炳率眾射之矢如雨注俄報賊攻北門門外有浮圖賊躋瞰虛實炳設疑兵炫之注以火箭賊技無所施會江西援至賊

續修廬州府志

卷四十七

武功傳一

十六

奔潰捷聞賞勞有差城東西北三面卑隘炳增高之又

建旗纛廟守禦廳譙樓民不知擾

江西通志

郭德合肥人從明太祖渡江取太平鎮江又征西土番

及湖湘兩粵屢立戰功授廣洋衛指揮僉事封明威將

軍卒賜祭葬

采訪冊

郭昌合肥人世襲指揮僉事任神策衛永樂時征交趾

兩使西洋有功進指揮同知封鎮國將軍又郭瑄世襲

指揮同知

采訪冊

郭震合肥人正統中從征麓川後鎮大同充總兵挂征

西前將軍印天順丁丑賜蟒玉追贈四代榮祿大夫

采訪冊

冊

巫凱合肥人史又作句容人由百戶積功至都指揮同知宣德

元年陞都僉事充總兵官鎮守遼東性剛嚴饒智畧在鎮三十餘年威惠並行邊備修飭前後守遼者皆莫及

焉史明

王勝字子奇合肥人官福州都指揮僉事景泰初海山賊起勝悉招撫復業未幾復聚爲寇殺掠官軍勝又諭之納款上聞賜金帛事母極孝後以孝行旌福建通志

張瓏合肥人官福建行都指揮僉事正統二年破龍巖等賊還卒於晉安驛福建通志

程鑿字本虛合肥人襲指揮僉事卒業經史將鑑諸書智勇過人從征新甯積寇遷指揮同知嘉靖初守備惠

潮居碣石衛剿和平賊酋李文績擇幹族十餘輩充鄉約正副構亭規勸漓族丕變遇饑饉榜諭富室互相資濟嶺東人以全活有司媿焉庚寅遷廣東都指揮僉事時與名公巨儒往還嘗登元覽臺雅歌有儒將風尋充左參將分守肇高廉雷四郡建議立成岡松柏二巡司提督林富從之未幾西徭賊黎廣趙林花攻劫府庫事聞富與總兵仇鸞皆戴罪鑿馳師赴之駐於陽春誘招賊酋徐二陽降因而殺之巢穴蕩平尋征連州朱砦功不得上罷歸已亥陵崖黎岐作亂提督蔡經起鑿討之斬獲三千六百級功冠諸哨捷聞獲賞癸巳升副總兵鎮守廣西瓊人愛之咸惜其去後母喪歸葬卒年五十

三鑿爲將與廣右沈希儀齊名而文學過之著有雪崖

集

廣西通志

許榮字榮卿舒城人少長雄偉汝潁盜延及江淮榮立屯烏沙河聚保鄉里適盜陷舒城邑人奉榮爲主盜相戒曰此烏沙許帥也勿犯其境榮因孤立求援於多寶假統軍元帥之號鎮舒有惠政甲午青巾掠大河以南惟不敢入榮境雙刀趙陷廬州分兵四出榮堅不動按地形修七門諸堰供灌溉之利教民農桑民賴以甯竹眞據安豐陷六安數乘勝來侵力戰卻之加驃騎上將軍同知樞密甲辰廬州歸明榮卽日誓眾封府庫籍軍民之數表上之方太祖徇江北榮遣人餽饟給衣裝拜

續修廬州府志

卷四十七

武功傳一

十八

錫衣卣鬯之賜入覲後恩眷彌篤命以前職鎮守明年

改廬州同知

康熙志

李讓舒城人以燕邸儀賓從起靖難力戰破平安兵永

樂初進駙馬都尉封富陽侯掌北京刑部事卒贈景國

公謚恭

康熙志

袁義廬江人本張姓德勝族弟也初爲雙刀趙總管德勝戰死始來附爲帳前親軍元帥賜姓名數從征伐積功爲興武衛指揮僉事從大將軍北征敗元平章俺普達等於通州走賀宗哲詹同於澤潞功最復從定陝西與諸將合攻慶陽張良臣兵驟薄義營義堅壁不爲動俟其懈力擊破之南取興元進本衛同知調羽林衛移

鎮遼東已從沐英征雲南留鎮楚雄蠻人屢叛義積糧高壘且守且戰以功遷楚雄衛指揮使嘗因入朝帝厚加慰勞以其老命醫爲染鬚髻俾還任以威遠人歷二十年墾田築堰治城郭橋梁規畫甚備軍民德之建文元年徵還爲右軍都督府僉事進同知

明史甯正傳

夏尙忠字懷耿廬江人以父守富軍功襲百戶天啟五年授都指揮僉事次年調守歸德時響馬肆掠捕治平之崇禎九年調揚州守禦十四年陞海防遊擊值流寇海賊交訌防捍有法以功陞海防叅將十七年歷陞南京神機七營副總兵都督僉事是年十二月加陞中軍都督府右都督順治初隸曹提督營食俸候推後奉調

續修廬州府志

卷四十七

武功傳一

十九

驗以年老放歸

縣志

夏君祥字天瑞無爲人元季兵亂以材武信義鄉里推爲城主至正己亥明兵至率眾歸附仍奉命協守本州修城繕隍調治兵食有姻親坐事當抵法竟編戎伍不

少徇陞知州

康熙志

薛祥字彥祥無爲人從俞通海來歸渡江爲水寨管軍鎮撫數從征有功洪武元年轉漕河南夜半抵蔡河賊驟至祥不爲動好語諭散之帝聞大喜以方用兵供億艱授京畿都轉運使分司淮安濬河築隄自揚達濟數百里徭役均平民無怨言有勞者立奏授以官元都下官民南遷道經淮安祥多方存恤山陽海州民亂駙馬

都尉黃琛捕治註誤甚眾祥會鞠無驗者悉原之治淮八年民相勸爲善及考滿還京皆焚香祝其再來或肖像祀之八年授工部尚書時造鳳陽宮殿帝坐殿中若有人持兵鬪殿脊者太師李善長奏諸工匠用厭鎮法帝將盡殺之祥爲分別交替不在工者並鐵石匠皆不預活者千數營謹身殿有司列中匠爲上匠帝怒其罔命棄市祥在側爭曰奏對不實竟殺人恐非法得旨用腐刑祥復徐奏曰腐刑廢人矣莫若杖而使工帝可之明年改天下行省爲承宣布政司以北平重地特授祥三年治行稱第一爲胡惟庸所惡坐營建擾民謫知嘉興府惟庸誅復召爲工部尚書帝曰讒臣害汝何不言

對曰臣不知也明年坐累杖死天下哀之子四人謫瓊州遂爲瓊山人孫遠正統七年進士景泰時官戶部郎中天順元年擢本部右侍郎改工部奉詔塞開封決河還仍改戶部成化初督兩廣軍餉位至南京兵部尚書以忤汪直免官

明史

郭彥仁無爲人少讀書有勇畧尤長吏事欵附後以忠謹見委任李文忠用兵淞西彥仁爲參謀多所裨益時胡大海與李文忠有隙太祖命彥仁調和之以功賜金幣金華苗將蔣英等作亂戕叅政胡大海彥仁率兵擊走之入金華撫其民時處州苗將李祐之等亦殺守將耿再成彥仁復領兵屯縉雲遏其侵軼後援新城取杭

州皆有勞授嚴州知府

康熙志

朱文無爲人從定金陵及江南諸郡由帥職累官指揮守太倉威望甚著從平淞西積功陞後軍都督僉事

明隆

慶志

汪源無爲人幼有膽力驍健善戰充水軍前翼頭目從元帥李志高指揮秦明祐修築本州城池又累從諸大將征伐身先士卒前後斬獲無算陞指揮僉事孫誌永

樂初以功改潞州衛指揮使

康熙志

施質無爲人元末爲義兵隊長有寇至泥汊聲言攻城質率眾往禦悉擒斬之從土人趙總管欵附授百戶改西安護衛從征沙漠予世職時北征諸將多失機獨質

續修廬州府志

卷四十七

武功傳一

二十一

身先士卒以所部全歸蒙特獎洪武三十年改貴州安

莊衛百戶

康熙志

廖永忠巢人楚國公安弟也從永安迎太祖於巢湖年最少太祖曰汝亦欲富貴乎永忠曰獲事明主掃除寇亂垂名竹帛是所願耳太祖嘉焉副永安將水軍渡江拔采石太平擒陳桡先破蠻子海牙及陳兆先定集慶克鎮江常州池州討江陰海寇皆有功永安陷於吳以永忠襲兄職爲樞密僉院總其軍從攻江州州城臨江守備甚固永忠度地高下造橋於船尾名曰天橋以船乘風倒行橋傳於城遂克之進中書省右丞從下南昌援安豐戰鄱陽復與俞通海等以七舟載葦荻乘風

縱火焚敵樓船數百又以六舟深入搏戰復旋繞而出
又邀擊之涇江口友諒死從征陳理理降還京太祖以
漆牌書功超羣將知邁雄師八字賜之懸於門已從徐
達克淮東諸郡從伐士誠取德清進克平江會湯和討
降方國珍進克福州定閩中諸郡至延平破執陳友定
尋拜征南將軍由海道取廣東至廣州降盧左丞禽海
寇邵宗愚數其殘暴斬之廣人大悅馳諭九真日南珠
厓儋耳三十餘城皆納印請吏進取廣西至梧州降元
達魯花赤拜住潯柳諸路皆下引兵克南甯降象州兩
廣悉平明年九月還京師帝命太子率百官迎勞於龍
江入見仍命太子送還第三年從大將軍徐達北征克

察罕腦兒還封德慶侯食祿一千五百石予世券明年
以征西副將軍從湯和帥舟師伐蜀至瞿塘關山峻水
急蜀人設鐵鎖橋橫據關口舟不得進永忠密遣數百
人持糗糧水筒舁小舟踰山渡關出其上流蜀山多草
木令將士皆衣青蓑衣魚貫走崖石間度已至帥精銳
出墨葉渡夜五鼓分出兩軍攻其水陸寨水軍皆以鐵
裹船頭置火器而前黎明蜀人始覺盡銳來拒永忠已
破其六寨會將士舁舟出江者一時並發上下夾攻大
破之焚三橋斷橫江鐵索禽同僉蔣達等八十餘人遂
入夔府明日和始至乃與和分道進期會於重慶永忠
帥舟師直擣重慶次銅鑼峽蜀主明昇請降蜀地悉平

帝製平蜀文旌其功有傳一廖二之語褒賚甚厚八年三月坐僭用龍鳳諸不法事賜死子權十三年嗣侯從傅友德征雲南守畢節及瀘州詔還十七年卒子鏞銘

傳見忠節

初廖永忠等之歸太祖也趙庸兄弟亦俱降庸廬

州人兄仲中累功爲行樞密院僉事守安慶陳友諒陷安慶仲中棄城走太祖誅仲中而以其官授庸從復安慶徇江西諸路進參知政事從戰康郎山與侖通海廖永忠等以六舟深入敗敵平武昌克廬州援安豐皆有功大軍取淮束庸與華高帥舟師克海安泰州進圍平江吳平擢中書左丞從大將軍取山東洪武元年命兼太子副詹事分兵渡河徇下河北州縣進克河間又從

大軍克太原下關陝從常遇春北追元帝師還遇春卒命庸爲副將軍同李文忠攻慶陽行至太原元兵攻大同急文忠與庸謀以便宜援大同再敗元兵於馬邑禽其將脫列伯三年復從文忠北伐克應昌師還論功最封南雄侯食祿一千五石予世券十四年閩粵盜起命庸討之踰年悉平又平廣東盜號鏟平王者還賜綵幣上尊良馬其冬出理山西軍務巡撫北邊二十年以左參將從傅友德討納哈出二十三年以左副將軍從燕王出古北口降乃兒不花還坐胡惟庸黨死爵除

明史

高顯巢縣人

通志引明史功臣表作合人

初練兵保鄉里太祖駐師

太平顯來附下江浙楚豫入元都平關陝顯皆從焉歷

指揮僉事三年分封諸王以爲燕府左副兼大興右衛
指揮使十一年從征松潘等州松州旣平城其地請立
軍衛置松州衛指揮使司設官戍守陞大都督僉事卒
追封汝陰侯謚武肅明隆慶志
花茂巢縣人初從陳埜先已而來歸積功授武昌衛副
千戶征西蜀進神策衛指揮僉事調廣州左衛平陽春
清遠英德翁源博羅諸山寨叛蠻及東莞龍州諸縣亂
民進指揮同知再遷都指揮同知世襲指揮使上言廣
東南邊大海姦宄出没東莞筍岡諸縣逋逃蠻戶附居
海島遇官軍則詭稱捕魚遇番賊則同爲寇盜飄忽不
常難於訊詰不若藉以爲兵庶便約束又請設沿海依

山廣海碣石神電等二十四衛所築城浚池收集海島
隱料無籍等軍仍於山海要害地立堡屯軍以備不虞
皆報可進都指揮使卒賜葬安德門長子榮襲職次子
英果毅有父風亦以軍功爲廣東都指揮使有聲明史

俞廷玉濠州人遷居巢江淮兵擾與子通海通源通淵
結縣人廖永安等屯巢湖爲水寨以捍寇亂數爲廬州
左君弼所窘聞明太祖駐師和陽乃相率持書乞援太
祖親至巢湖拔其軍出黃墩兵威自此益振廷玉從渡
江積功至樞密僉事總舟師攻安慶歿於陣贈龍虎將
軍上護國同知樞密院事追封河間郡公康熙志
俞通海字碧泉性沈毅多智治軍嚴而有恩士樂爲用

巢湖諸將皆長於水戰而通海爲最從破海牙諸水寨授萬戶從渡江克采石取太平狗下諸屬縣進破陳兆先取集慶路從湯和拔鎮江遷秦淮翼元帥偕諸將取丹陽金壇常州遷行樞密院判官從克甯國下水陽以舟師畧太湖降張士誠守將於馬蹟山艤舟胥口呂珍兵暴至通海身先疾鬪矢中右目不能戰命帳下士被已甲督戰敵以爲通海也不敢逼徐解去陳友諒圍南昌從太祖擊之遇於康郎山舟小不能仰攻力戰幾不支通海乘風縱火焚其舟二十餘敵少挫明日復戰偕廖永忠等以七舟置火藥焚敵舟數百踰二日復以六舟深入敵連大艦力拒太祖登舵樓望久之無所見意

已沒有頃六舟繞敵艦出飄飄若遊龍軍士謹譟勇氣百倍戰益力友諒兵大敗師次左蠡通海進曰湖有淺舟難回旋莫若入江據敵上流彼舟入卽成禽矣遂移師出湖水陸結柵友諒食盡引兵突走竟敗死是役也通海功最多明年從平武昌拜中書省平章政事進攝江淮行中書省事鎮廬州從徐達圍平江戰滅渡橋擣桃花塢中流矢創甚歸金陵太祖幸其第問曰平章知予來問疾乎通海不能語太祖揮涕而出翼日卒年三十八追封豫國公侑享太廟肖像功臣廟洪武三年改封虢國公謚忠烈通海無子弟通源嗣其官通源字百川從大將軍征中原定河口渡河克鹿臺取鳳翔鞏昌

國朝乾隆四十一年

子靖嗣官

明史

賜謚烈愍

通志

續修廬州府志

卷四十七

武功傳一

二十六

李榮廬州巢縣人從太祖克滁和定江左北伐中原皆有勞績繇總旗授永平衛千戶陞廣武衛指揮僉事洪武五年從李文忠繇東路出居庸擣應昌取和林渡臚胸河兼程而進深入土刺與蠻子哈刺章戰至渾河文忠馬中流矢下馬持短兵接戰榮卽以所乘馬授文忠文忠得馬氣益厲遂敗敵俘獲以萬計是役也榮翼衛之功居多六年復從北征有功

明隆慶志

趙雄巢縣人自巢湖歸附太祖從平中原功多封南雄

侯坐藍玉黨國除

康熙志

金朝興巢縣人淮西亂聚眾結寨自保俞通海等旣歸太祖朝興亦率眾來附從渡江征伐皆預有功洪武三

年論功爲都督僉事兼秦王左相朝興沈勇有智畧所至以偏師取勝雖未爲大帥而功出諸將上十一年從沐英西征收納鄰七站地論功封宣德侯祿二千石世襲指揮使卒追封沂國公謚武毅十七年論平雲南功改錫世侯券增祿五百石長子鎮嗣封二十三年追坐朝興胡惟庸黨降鎮平壩衛指揮使從征有功進都指揮使其後世襲衛指揮使嘉靖元年命立傅友德梅思祖及朝興廟於雲南額曰報功明史

楊義巢縣人從元帥俞昭屢立戰功官遼東都指揮僉

事調福建

明隆慶志

楊興巢縣人初事雙刀趙以智勇聞歸太祖從破安慶

續修廬州府志

卷四十七

武功傳一

二十七

殲陳友諒滅吳定中原皆有功授指揮僉事討廣西叛

蠻克郎八保及三千八萬向家等砦招降土官王萬全

等陞貴州衛指揮予世襲

明隆慶志

唐賀巢縣人性勇毅才識卓偉歸太祖積有戰功擢湖

州衛指揮僉事階明威將軍

明隆慶志

張旭巢縣人從太祖渡江畧定江浙楚地以功僉衡州

衛指揮事予世職

康熙志

楊廣巢縣人初事雙刀趙丁酉自宣州歸附太祖授左

翼元帥副使管軍千戶屢立戰功其後從西平侯沐英

征洮州中矢傷左脇卒賜葬橐皋令詞臣撰碑銘以昭

勲節

康熙志

曹貴巢縣人本富家兒歸太祖積功授指揮僉事洪武十九年乞歸子儼襲未幾復以爲定海衛指揮授廣威將軍貴性忠亮在定海時海賊竊發軍中輒造銅牌爲小校所訴上曰軍事不可緩也諭其人而遣之寵賚不一賜號禪口復許服金龍與公侯伍二十三年詔優老於巢次子儀有隱德號梅巖居士孫亨安邑令曾孫廣虞城教諭元孫環領鄉薦琥登進士巢邑武勲惟貴子孫以文顯云

康熙志

高謙巢縣人甲午偕弟諒歸太祖以智勇選居前部戰輒有功累陞指揮同知奏言家屬甚眾非祿養所能給願分撥回鄉賜水陽田地一千七百畝贍其家予世職

續修廬州府志

卷四十七

武功傳一

二十八

康熙志

倪旺巢縣人歸太祖以戰功累陞定遼中衛指揮僉事

卒子昶襲孫璘再襲

明隆慶志

金斗輔巢縣人乙未從太祖征討以功授大都督府僉

事

明隆慶志

陳奉巢縣人與俞廖共事授廣洋衛指揮病故歸葬東

口子欽欽子敬世襲成化間有庶支在巢者曰陳能

康熙志

志

成武巢縣人至正丙申事蠻子海牙充水砦頭目及敗

降隨廖永忠立功授千戶卒子凱襲以功陞杭州前衛

指揮凱卒子綱嗣職

康熙志

周通巢縣人父周興歸太祖敘功世襲六安衛指揮使

康熙志

宋允字執中巢縣人元季集義兵衛鄉邑眾推爲千夫

長後從俞通海立功陞鎮江衛指揮僉事調金吾衛

康熙志

志人

丁襄巢縣人從太祖戰鄱陽有功除副千戶又吳斌吳

徐與襄同時百戶竝世襲

康熙志

尹貴巢縣人太祖時爲列校從征陞百戶戰白溝河陣

亡子整襲

康熙志

陳仲良巢縣人自采石從征授昭信校尉復州衛流官

百戶同時有傅鎧者官鐵嶺衛都指揮使

康熙志

續修廬州府志

卷四十七

武功傳一

二十九

孫世巢縣人以隨征功累中軍都督府僉事卒上輟朝

遣官致祭追封富春侯

康熙志

陳清巢縣人從和陽入金陵取淮浙湖廣江右皆有功

領舟師捕倭寇殺獲甚眾僉中軍都督府事以年老俾

食祿致仕卒追封合浦侯諡崇武

康熙志

王玉巢縣人歲壬辰太祖起兵於濠玉與弟瑛來歸留

衛帳下玉剛勇有謀繆家山寨兵勁悍首攻夷之再蹂

黃墩蕩湖口賊莫敢當其鋒授千夫長取滁和敗青山

兵從擊雞籠山羣盜以功授萬夫長從渡江奪采石克

太平東收溧陽溧水攻宣州克臺城復南徐陞右副元

帥從徐達攻常州張士誠弟士德來援玉遣男虎子追

擒之陳友諒僞平章李明道領兵五萬圍廣信玉手俘
明道送京師太祖因授明道官命爲鄉導以取江西玉
之功於是爲大

明隆慶志

王瑛字君寶玉之弟玉每戰瑛常與左右相爲犄角玉
卒廷議以瑛久在兵間聲望素著命統其眾張士誠侵
新城瑛舞槊衝其中堅賊大敗受上賞從攻浦城大小
之戰數十斬首二千餘級虜將校五十餘人降卒八百
餘人已從李平章取桐廬富陽餘杭遂入錢塘陞指揮
副使又從胡左丞捕寇海中殲之洪武二年加明威將
軍從李平章北征行至通州病歸歿於毘陵年三十五
歲上聞而悼之賜衣廩土田存恤其家

明隆慶志

戈預巢縣人歲乙未從太祖渡江積有功烈由指揮歷
陞中軍都督府都督坐謫行伍子戡武洪二十五年有
功陞指揮使以其官遜於兄弼任廬州衛後調濟甯右
衛弼以疾請歸職於戡陞廣東都督指揮僉事

明隆慶志

張禮巢縣人遵化千戶從靖難功署中都留守在任十

有六年軍律嚴明人皆畏服

明隆慶志

